

# Narunapulo kayukot an andam sumaliwan ha mga martir han Dolores

Partido Komunista ng Pilipinas  
Agosto 24, 2021

**N**ananawagan kami ha katawhan Pilipino ngan ngatanan nga rebolusyunaryo nga pwera nga alsahon an ira mga kamao ngan saludaran an 19 nga martir han Dolores, mga Pula nga mangaraway han Bagong Hukbong Bayan (BHB) nga namatay ha panmomba tikang ha kahanginan nga ginhimo han suportado-han-US nga pasista nga Armed Forces of the Philippines (AFP) hadin Agosto 16 ha Barangay Osmeña, bungto han Dolores, Eastern Samar.



Kaupod hira ha pinakamag-upay nga anak han katawhan nga naghalad han ira kinabuhi para ha tinguha han nasyunal nga katalwasan ngan demokrasya. An ira pagkamatay, mabugat gud ha kasing-kasing han mga trabahador ngan parag-uma ha bug-os nga nasud ngan han ngatanan nga tiniyupi nga katawhan ha bug-os nga kalibutan. Naduyog ha kasubo an masa ha pagkamatay han ira mga mangaraway ngan tagserbe. Kundi kadungangan hini, naghahatag an ira pagkamartir hin insiprasyon ha aton nga umato hin mayda dugang nga kadig-on ngan katangkuran nga pagserbihan an katawhan ngan ira rebolusyunaryo nga kawsa. Bug-os nga kinabuhi nga hihinumdumon an mga martir han Dolores.

Kaparte han 50 katawo nga yunit han BHB an mga namatay nga pula nga mangaraway nga aada ha erya agud maghimo hin pampulitika, panmilitar, pan-ekonomiya, pan-edukasyon, pankultura ngan pankalibugan nga buruhaton ha ranggo han masa nga parag-uma. Naghihimo hira hin imbestigasyon hiunong ha sosyo-ekonomiko nga kondisyon han masa nga parag-uma ha lugar ha katuyuanan

nga batunon an ira mga panginahanglan ngan problema.

Sugad han iba nga yunit han BHB ha rehiyon, iginpapatuman nira an nagpapadayon nga kampanya agud isahon an kahibaruan han katawhan hiunong ha Covid-19 nga pandemya agud pugngan ini nga makaabot ha mga interyor nga baryo kun diin waray pankalibugan nga mga pasilidad. Mayda liwat usa katim han medik ha grupo nga nakatalaan nga operahan an usa nga pasyente ha kampo nga mayda luslos ngan iba pa nga panmedikal nga pitad. An masa nga paraguma ha lugar, nga maiha na nga ginpasibayan han reaksyunaryo nga estado, nakagbenepisyo unta ha mga panmedikal ngan dental nga serbisyo, literasiya ngan iba pa nga serbisyo nga andam ighatag han nasering nga yunit han BHB.

Tinuod nga usa nga dako nga kawarayan an pagkamatay han mga martir han Dolores. Sugadman, usa la ini nga temporaryo nga pag-atras ngan diri hini mapapara an pankabugusan nga pag-abante han gerra han katawhan. Ha kamatuoran, ha Eastern Visayas ngan ha iba pa nga parte han nasud, padayon an paabante nga mga

pitad han BHB ha pagrek-luta han bag-o nga mga Pula nga mangaraway, pagtukod hin dugang pa nga mga yunit, pagpahiluag han erya nga gingigiusan, pagtukod han mga bag-o nga prente gerilya, pagdepensa ha katawhan kontra ha armado nga panmuypoy han AFP ngan ha paglalansar han mga taktikal nga opensiba agud magdurot hin kahibangan ha mga pasista nga hali-maw. Ha tukma nga panahon, utro nga bubug-uson an gerilya nga yunit han BHB ha Dolores pinaagi han mga bag-o nga rekrut nga magpa-padayon ha nabayaan ng buruhaton han ira mga namatay nga bayani.

Andam an BHB nga pakyason an katuyuanan nga gindeklara ni Duterte nga amo an puuhon an armado nga rebolusyon antes mahuman an iya termino. Diri la malalahusan han BHB hi Duterte, kundi sigurado nga matindog ini nga mas konsolidado ngan mas determinado nga umato para ha katawhan Pilipino, ngan agud ipasulong an pakigbisog kontra ha imperyalismo, pyudalismo ngan burukrata kapitalismo.

"Narunapulo kayukot..," tikang ha paypay 1

Kinahanglan kundenaron an AFP ha panmomba, pangistraping tikang ha kahanginan ngan panganyon. Lahus-lahusan ini nga mga armas ngan sobra kaupay an kusog tanding ha ira kakontra. Ginsesering nga "baltok" an mga "smart bomb" nga ginsusuplay han US ha AFP, kundi an tinuod, tapang ini ngan waray kapas paglainon an armado ha diri armado, an kombatant tikang ha mga sibilyan. Hiluagan na an pagkundenar ha panmomba tikang ha kahanginan tungod ha durot hini nga hiluagan nga pagkamatay han mga sibilyan ha Afghanistan, Pakistan, Yemen, Palestine, Syria ngan iba pa nga lugar kun diin gin-gamit ini han imperyalista nga US. Ha kaso han panmomba ha Dolores, pakyas an mga bomba han AFP nga paglainon an mga medik ngan pasyente, ngan iba pa nga diri armado nga tawuhan nga waray kapas umato.

Tungod ha ira kapakyasan nga palibutan ngan perdhion an mga gerilya

nga pwersa han BHB nga nakarawat hin diri nahuhubas nga suporta tikang ha masa, naggamit an mga talawan nga terorista nga halimaw han panmomba ngan pangistraping tikang ha kahanginan. Kinahanglan igdiri ini nga mga terorista nga armas tungod kay nagdudurot ini hin tinagdamo nga pagkamatay ha mga diri armado nga katawhan, iginbubutang hini ha kadelikaduhan an mga sibilyan, nagdudurot hin trauma ha yukut-yukot nga katawhan, labina ha kabataan, ngan ginhibang ngan ginwawakay an kalibungan ngan mga propyedad.

Kinahanglan padayon nga kumuha hin leksyon an mga yunit han BHB, pauswagon an ginerilya nga taktika, isahon an pampulitika ngan panmilitar nga kapas han mga Pula nga mangaraway, pahitas-on an ira disiplinang dugang nga pahilarumon ngan pahiluagong an suporta han masa agud igpabilin nga bungol ngan buta an kaaway ngan himuon nga waray pulos an ira

paggamit hin magbakod nga armas. Ha tidaraon, mapapamatud-an nga waray pulos an panmilitar nga superyoridad han kaaway kontra ha pampulitika nga superyoridad han BHB ngan ha kabatiran hini ha ginerilya nga pakiggerra ngan ha pisikal ngan pankatilingban nga tereyn.

Bug-os nga kinabuhi nga hahatagan hin importansya han katawhan Pilipino, han Partido ngan mga rebolusyunaryo nga pwersa an mga sakripisyo han mga martir han Dolores. Permi magseserbe nga inspirasyon ha masa ngan mga Pula nga mangaraway an ira kamabayanihon agud atuhan an mga pasista nga terorista, makigbisog kontra ha magtalumpiguson ngan magtiyupion, depensahan an ira mga katungod ngan ipasulong an kawsa han nasyunal nga katalwasan ngan pankatilingban nga hustisya.

Nawarayan man kita hin pira nga mag-upay nga mga Pula nga mangaraway, sigurado nga mas damo pa an masaliwan ha ira komo mga bag-o nga Pula nga mangaraway han mabayanihon nga hukbo han katawhan. ■

## Hitaas nga pasidungog ha 19 nga martir han Dolores

National Democratic Front- Eastern Visayas  
Agosto 30, 2021

**G**in-aalsa han mga rebolusyunaryo nga pwersa ngan hiluag nga katawhan han Eastern Visayas an ira kamao komo pagsaludar ha 19 nga kaapi han Bagong Hukbong Bayan (BHB) nga namartir ha madarahug nga panmomba tikang ha kahanginan han Armed Forces of the Philippines (AFP) ha Dolores, Eastern Samar.

Kaangayan la nga igselebrar an Adlaw han mga Bayani hini nga tuig pinaagi han paghatag hin hitaas nga pagpasidungog ha mga martir han Dolores. Kaupod hira ha pinakamagrangat ngan pinakamag-upay nga anak han katawhan nga maungod nga naato ha pasista nga ngirhat ngan grabe nga kakurian nga gindurot han reaksyunaryo nga sistema ha katawhan. Mga bayani hira han rebolusyon ngan han mabayanihon nga pakigbisog han katawhan para ha demokrasya ngan katalwasan. Ginpapanawagan

ha ngatanan nga yunit han BHB ngan mga rebolusyunaryo nga organisasyon masa ha Eastern Visayas nga saludaran yana an mga martir han Dolores.

Kinahanglan pursigido nga kundenaron han katawhan an lahus-ha-kinahanglan nga pwersa, arogansya, ngan mapanmatay nga palisiya han pasista nga rehimen Duterte ngan han AFP nga ira ginpakita ha ira airstrike



"Hitaas..," sundan ha paypay 3



"Hitaas.." *tikang ha paypay 2*

kontra ha platun han BHB ha Dolores. Ini nga atake pag-atentar nira nga madarahug nga puypuyon an pakigbisog han katawhan para ha tinuod nga kamurayawan ngan demokrasya, katalwasan ngan kauswagan, kontra ha pasista, niyutiyo, mapandabong, pasibaya, ngan tiraniko nga paghahadi han rehimen Duterte. Ginpatay an mga martir han Dolores samtang waray hira kapas umato ngan hin waray kaluoy o pag-alang han mga pasista nga parupanmatay han AFP.

Mapaso nga gintapo ngan ginhangkop han masa nga parag-uma an unit han BHB nga nagios ha prente ha Eastern Samar. Nakuha nira an simpatiya ngan suporta han masa tungod kay gin-atuhan nira an mga armado nga kriminal nga elemento ngan sindikato han ilegal nga droga nga ginpoprotehiran han lokal nga kapulisan ngan kasundaluhan. Tikang han magtikang an hukbo han katawhan ha prubinsya, gin-atuhan han BHB kaupod han masa an mga despotiko nga agaron maytuna ngan nanlulupot hin tuna nga nanbibiktima ha damo nga gudti nga parag-uma ngan tag-iyahin tuna. Hini nga naglabay nga kat-ani, damo nga masa nga parag-uma an nahiagum han destroso ha ira mga umhanan tungod ha baha ngan panmeste. Ha ira kangalas, gintawag nira ini nga "na-Duterte." Aktibo hira nga ginbuligan han unit han BHB ha parag-uma.

Labot ha pagbulig ha produksyon, naghatag liwat hira hin serbisyo medikal ngan pampulitika nga edukasyon ha mga residente. Binulig hira ha pagpasamwak hin impormasyon hiunong ha pandemya ngan naghimo hin kampanya nga pampubliko nga kalibsugan ha mga komunidad kun diin haros waray panmedikal nga pasilidad ngan maiha na nga ginpasibayan han reaksyunaryo nga estado.

Ginhangkop han mga lokal nga masa an BHB komo ira tinuod nga hukbo. Damo ha mga kaapi han BHB nga ginpatay han AFP gamit han ira 4,000 kalibras nga bomba ngan gin-istraping gamit han ira mga bag-o nga fighter

jet ngan *attack helicopter*, mga lokal nga kabatan-unan nga parag-uma nga bag-o pa la narekluta ha hukbo han katawhan. Kaupod hira ha pinakamagandang nga kabatan-unan nga Pilipino nga padayon nga tinagdamo nga nasampa ha hukbo han katawhan ngan nag-uungara para ha rebolusyunaryo nga pagbabag-o ha butnga han grabe nga panlasurbo nga gindurot han natikagrabe nga krisis ha ekonomiya, pulitika ngan kalibsugan.

Waray magin ulang an panarhug ngan pan-uwat han pasista nga rehimen ha ira karuyagon nga mahibaro ngan makadiskubre ngan aktibo nga pumartisipar ha armado nga rebolusyon. Ha rebolusyunaryo nga pakigbisog la nira nakit-an an dalan ngadto ha hul-os nga pagsolbar ha hiluagan nga kakablasan, kagutom, pananalumpigos, kawaray panginabuhin, ngan masirom nga kabuwason ilarum han mapandabong, mapanmuyop ngan korap nga paghahadi han rehimen Duterte. Saludaran naton an mga marayhak ngan makanasud nga kabatan-unan nga Pilipino nga naapi ha BHB agud tinuod nga magserbe ha katawhan. Samtang nagigin mas madarahug ngan waray kaluoy an rehimen, mas damo nga anak han katawhan, labina an kabatan-unan, an naduduso nga tumindog ngan umato.

Ginpapanawagan ha ngatanan nga rebolusyunaryo nga pwersa ha Eastern Visayas nga maghatag hin pinakahitaas nga pagsaludar ha

mga martir han Dolores. Ngatanan nga unit han BHB ngan rebolusyunaryo nga organisasyon masa ginpapanawagan nga maghimo hin mga pankultural nga programa ngan maghalad hin mga kanta, sayaw, luwa, ngan iba pa nga pankultural nga pasundayag nga nageselebrar han kinabuhin ngan sakripisyo han ngatanan naton nga rebolusyunaryo nga martir. Alsahton naton an aton mga kamao ngan hinumdumon hira komo aton mga mabayanihon nga tagdepensa, giya, kasama, magtuturo, doktor, suok nga sangkay ngan kaupod ha panahon han kalipay ngan kasubo. Subaron naton an ira maranggat nga pananglitan han hukas-ha-kasingkasing nga pagsakripisyo ngan pagserbe ha katawhan ngan ha rebolusyon.

Yana nga gin-aatubang naton an natikagrabe nga pasista nga pangatake han terorista nga rehimen, himuon naton an mga martir han Dolores, kaupod an ngatanan naton nga mga rebolusyunaryo nga martir, komo inspirasyon ha pagpasulong han makatadungan nga gerra nga ira ginbuhisan han kinabuhin. Pasidunggan naton hira pinaagi han pursigido nga rebolusyunaryo nga pakigbisog agud tapuson an pasista nga tiraniya han rehimen Duterte. Ha dayaday, an mga bomba ngan armas han kaaway mauungbawan han aningal han pakigbisog han katawhan; malalamon an tuna nga ira ginsunog han mga larab han rebolusyon. ■



# Ura-ura kamadarahug, ura-ura kamagastos: Ginhulog han AFP an 2 katonelada nga bomba ha Dolores, Eastern Samar

Partido Komunista ng Pilipinas  
Agosto 26, 2021

**H**adton Agosto 16, kontra ha gintatantiya nga 50-katawo nga yunit han Bagong Hukbong Bayan, naglansar an Armed Forces of the Philippines (AFP) hin ura-ura kabrutal nga kampanya hin panmomba tikang ha kahanginan, ginmalgastar an bilyon kapisos nga pondo agud makontento an diri nawawara nga kauhaw han rehimen Duterte nga pumatay, pumatay, pumatay. Diri mamenos ha 19 katawo an napatay han panmomba.

Basar ha report nga nakarawat namon tikang ha Eastern Samar, naghulog an AFP hin maabot 4,000 kalibras (porlomenos 1.8 metriko tonelada) han mga bomba tikang alas-4 han aga ha porma han diri mamenos ha walo nga 500 kalibras nga bomba. Ginhulog an mga bomba gamit an FA-50 nga *fighter jet* ngan mga A-29B Super Tucano *light attack aircraft*.

Tikang han alas-8 han aga, duha nga pan-atake nga helikopter (Agusta-Westland) ngan duha nga pankar-go nga helikopter (ginpalsakan hin masinggan nga Sikorsky nga mga helikopter) an nagdara han mga tropa ha ubos, nagpabuto hin *rocket missiles* ngan nangistraping ha erya tubtub ha kulop.

Subay ha tantiya han kumand han BHB ha erya, gumamit an AFP hin mga edro nga mayda Gattling-nga-estilo hin kanyon agud magpabuto hin dagko nga bolyum hin higtaas-nga-kalibre nga bala.

Diri mamenos ha pito nga pansarbeylans nga *drone* an gindeploy

kaupod an Hermes-900 antes an panmomba ngan lumupad ha erya hin pira kaoras kahuman han syahan nga mga bomba nga ginhulog. Magkulop liwat hira nga paturapak nga nanganyon bisan kun waray hira klaro nga target.

An waray wantas nga panmomba tikang ha kahanginan, pangistraping, an paggamit hin *anti-tank* nga mga armas ngan panganyon han AFP natalapas ha pagsurundon hiunong ha paggamit hin katupong ngan kinahanglan nga pwersa ilarum han internasyunal nga tawhanon nga balaud.

Ura-ura ngan diri katugbang nga pwersa an paggamit hin mga bomba ngan *anti-tank* nga armas kontra ha mga gerilya nga mangaraway nga nakaturog ngan armado la hin mga riple ngan mas magluya nga armas, ngan kontra ha mga medik ngan diri-armado nga tawuhan nga nakadto han kampo.

An grabe nga panmomba tikang ha kahanginan nagdudurot gihapon hin hiluagan nga pagkawakay han rekurso ha kagugub-an ngan katubigan nga amo an surok han panginabuhi han masa. Nagdudurot gihap ini hin hiluagan nga *trauma* ha mga lokal nga residente.

Dugang pa, imoral para ha rehimen US-Duterte nga magmalgastar hin bilyon-bilyon kapisos para ha kontra-insurhensiya nga gerra ha butnga han pandemya kun diin gin-uagnat han natikahitaas nga kaso an kapasidad han mga ospital ngan nag-aantos an milyones ha kawaray trabaho, kakablasan, ngan kagutom. ■

